

*Conhuntamente cu UNOCA*

## Artista, fotografo Anuar Habibe, den exposicion

**ORANJESTAD** – Diabierna ultimo, a tuma luga e prome edicion di “Korte weg”.

Esaki ta un caya cortico, den caya grandi cu lo wordo destina pa promove arte local

y destina pa artista. Anuar Habibe kende ta un fotografo tabata e “highlighted artist” e biaha aki.

Pues e caya, a wordo yena cu exposicionnan di fotografianan cu el a saca den transcurso di tempo. Acompaña

pa diferente artistanan local cu a bin pa sea bende cuminda of nan arte cu nan mes ta traha. E anochi tabata tin e ambiente di e un mini festival. Habibe ta bisa cu e ta disfruta saca potret di scenarionan diario y di bida en general.

### E idea

Habibe ta conta Bon Dia Aruba cu tur cos a pasa masha lihe, pa casualidad el a topa cu Ana Maria, kende ta e persona encarga cu e public relations y marketing di UNOCA. Y un amiga di Habibe, a bisa Ana Maria pa e check out Habibe su trabou. Y asina Ana Maria a bira masha emocionada cu Habibe su trabou y a sugeri pa e bira nan “highlighted artist” pa e edicion aki.

Habibe ta comenta cu e tabata tin interes den fotografia pa añanan largo. Pa mas cu 10 aña caba, pero el a cuminsa tuma esaki na serio ora el a cumpra su prome camara profesional. Cual tabata na 2008. E mision di korte weg ta pa logra haya hende sostene arte local y cera conoci cu e artistanan tambe. Habibe ta bisa cu e ta haya cu e anochi tabata uno exitoso mirando con hopi interaccion tabata tin entre e hendenan. Tur tabata yena cu pregunta, no solamente cu ne pero tambe cu e otro artistanan cu tabata presenta ta presenta nan artesanian y



nan cuminda. “Un mucha muhe a bisa ami, cu di algun manera mi potretnan ta pone sinti tristo. El a bisa esaki como un compliment. Esaki a touch mi, mirando cu esaki kiermen mi a mishi cu un otro hende su emocionnan pa medio di fotografia. Esaki tabata e compliment mas grandi pa mi durante henter e anochi. Hendenan a bin, nan a gusta e ambiente y nan a keda tambe. 9or di anochi ora tur e artistanan a cuminsa ruim op, ainda tabata tin hopi hende” Habibe ta subraya.

### Arte na Aruba

Algun luna pasa, Bon Dia Aruba a entrevista e maestra di baile Pierangely Wever, kende a bisa “e futuro di arte

na Aruba ta mustra briyante”. Wel, ta parce cu si. Poco poco por mira con diferente instancianan ta uniendo pa bolbe haci arte un parti integral den comunidad. Pa lunanan largo nos a scucha di artistanan local cu nan ta sinti cu nan no ta wordo balora mucho. Y cu e comunidad no ta comprende mucho con importante e ta pa un sociedad tin su artistanan autentico. Wever, den su entrevista tambe a bisa cu e si a wak hopi crecimiento den e mundo di arte pasobra tempo el a cuminsa como mucha ta baila, na Aruba di berdad no tabata tin practicamente mucho pa haci. Cu tempo mas y mas a cuminsa bin y mas hende a cuminsa kere den arte. □

